


Benedicti Papae XIV: Allocutio habita in Comitibus
generalibus Fratrum Ord. Praedicatorum in Con-
ventu S. Mariae super Minervam celebra-
tis V. Nonas Julii 1756.

Fol. 4013



BENEDICTI

SANCTISSIMI DOMINI NOSTRI.

PAPAE XIV.

ALLOCUTIO

Habita in Comitibus Generali-
bus Fratrum Ordinis Prædicato-
rum

IN CONVENTU

SANCTÆ Mariæ SUPER

MINERVAM

Celebratis V. Nonas Julii MDCCLVI.

ROMAE

Excudebant Joachimus, & Jo: Josephus Sal-
vioni Typographi Pontificii Vaticani
IN ARCHIGYMNASIO SAPIENTIAE


REIMPRESSA

LEOPOLI Typis S. R. M. & Collegii Soc: JESU.



59945

ROMA



MAGNA res agitur in hoc conventu vestro, Dilecti Filii, cui hodierna die præsides; nec modo pro Familiæ vestræ rationibus gravissima, sed etiam pro totius Ecclesiæ statu non leve pondus habitura: cui perficiendæ incredibili cum gaudio Nos interesse profitemur, ut omnibus manifestum faciamus gratum, memoremque animum nostrum erga Ordinem vestrum, quem summo ipsius merito jamdudum & amamus & colimus.

Verum, quanta sit agendæ rei magnitudo, silentio prætermitemus; cum nemo vestrum

(IV)

10 ignoret, cujus momenti sit, Magistrum Generalem Ordinis vestri deligere, cui semel delatum regimen, perpetuum, dum vixerit, futurum erit; cumque unusquisque ex eo splendoris loco, quem Dominicana Familia in Ecclesia Christi obtinet, facile intelligat, illius Rectoris electionem, non ad solam ejusdem Familiae utilitatem, & administrationem referri, sed etiam ad universam Christianam rempublicam ratione aliqua pertinere. Itaque sermonem nostrum redigemus ad ea, quæ Nos Ordini vestro debere cognoscimus, quæque Nos ita jampridem affecerunt, ut eundem & amare & colere semper professi simus, & adhuc profiteamur; eaque de causa præsentem diem felicissimum Nobis existimemus, & inter paucos illos adnumerandum, quos sexdecim hisce calamitosi Pontificatus Nostri annis cum aliqua animi voluptate transegimus.

Et sane, post absoluta leviorum artium studia, cum Sacrae Theologiae operam dedimus, non magnos in ea progressus Nos quidem fecisse intelligimus; sed, siquid profecimus, id omne acceptum referre debemus bonæ memoriæ Cardinali Thomæ Ferrario, clarissimo Ordinis vestri Theologo, qui rectam Nobis nobilissimæ disciplinæ viam aperuit, suæque institutione, atque opera ad incœptum

ptum iter persequendum adjuvit; immo, cum ¹¹ Palatii Apostolici Magisterio fungeretur, Theologicae laureae honorem ipse Nobis detulit, eaque occasione monumentum scripto exaratum reliquit, quo de propensa nostra erga sanctiores disciplinas voluntate honorifice testabatur, maioraque à Nobis expectari posse declarabat, si, quemadmodum animati tunc videbamus, in instituto curriculo persisteremus.

Amplam hanc Aulam, in qua nunc confidemus, Nos ipsi à fundamentis excitari olim vidimus, mox omnigena litteraria supellectile ornari, ita, ut inter insigniores universi Orbis Bibliothecas merito accenseatur; eandemque postquam studiosorum commodo patefieri conspeximus, cum primis adire certavimus, & frequentare nunquam destitimus, donec impositæ Nobis alterius generis curæ Nos alio avocarunt.

Longiori autem vitæ nostræ cursu, quem, paucis detractis annis, in Urbe egimus, nemo ex sodalibus vestris fuit vel dignitate, vel sapientia, & doctrina excellens (fuerunt autem excellentes permulti) qui Nos omni officiorum genere, & præcipua quadam amicitiae necessitudine complexus non fuerit. Sed reliqua multa omittentes, hoc unum commemorabimus, sublimem Cardinalatus dignitatem,

quam immerentes adepti fuimus, eximiæ erga Nos liberalitati sanctæ memoriæ Benedicti XIII. Pontificis Maximi, & Ordinis vestri olim Alumni, unice à Nobis deberi.

Regressi deinde Bononiam Patriam nostram, vigentem in ea invenimus memoriam rerum à Sancto Dominico Patriarcha vestro in ea gestarum; tum scilicet insignium peccatorum, qui assiduis illius concionibus permoti à semita iniquitatis ad viam salutis revocati fuerunt (1); tum virorum doctrina, & sanctitate illustrium, qui in ea urbe sodalitati vestræ nomen dederunt (2); tum etiam Generalium Comitiorum, quæ prima omnium Ordinis vestri ibidem habita fuerunt, in quibus ipsius ordinis præfectura eidem Sancto Dominico Fundatori communibus suffragiis delata fuit (3); denique cives nostros cum incredibili animi nostri lætitia perpetuo vidimus obsequiis, & votis celebrare sepulchrum Patriarchæ vestri, qui Bononiæ ex hac vita decedens (4),

pretio-

(1) Flaminus in *vita S. Dominici* lib. 2. fol. 47. & tom. 1. *Annalium Ordinis Prædicatorum* ad annum 1219. num. 37.

(2) Fr. Jordanus in *vita S. Dominici* n. 35. Flaminus loc. cit. Malvenda in *Annalib: Sacri Ordinis Prædicatorum* ad annum 1219. atque eod. tom. 1. *Annal. Ordin. Præd.* loc. citato.

(3) Die xvii. Maii MCCXX. cit. tom. 1. *Annal. Ord. Præd.* ad an. 1220. n. 39.

(4) Die vi. Augusti MCCXXI. cit. tom. 1. *Annal. Ord. Prædicat.* ad Ann. 1221. num. 25. in fine.

pretiosum ei civitati reliquit Corporis sui thesaurum, quod quidem augusto mausoleo conditum ibidem summa cum religione asservatur. In ipsa vero administratione Archiepiscopalis officii, quod ibi pluribus annis gessimus, oculos sæpe convertimus ad præclara gesta Jacobi Boncambii, qui ex Ordine vestro ad Bononiensem Ecclesiam regendam assumptus, tanta in verbi Dei prædicatione famæ celebritate floruit, ut finitimarum civitatum populi, quemadmodum historiæ nostræ testantur (1), ad illum audiendum, percipiendamque ex illius ore salutis scientiam certatim confluxerint.

Postquam vero, nihil tale promeriti, ad supremum Pontificatus apicem devenimus, propensa nostra erga Dominicanam Familiam amoris, & cultus affectio, supra quam dici potest, excrevit. Apostolicam enim Beati Petri Cathedram trophæis suis exornant tredecim ex alumniis vestris, qui à Romanis Pontificibus, post accuratissimum rerum omnium examen, in Sanctorum numerum relati fuerunt, inter quos Sanctus Pius V. Prædecessor noster, pro cuius Canonizatione, dum in minoribus constituti, Advocati Consistorialis munere fungemur, operam, laboresque nostros impendisse gloriamur; & Sancta Catharina de Ricciis,
B
quam

(1) Sigonius lib. 2. de Episcopis Bononiensibus ad annum 1244.

quam Nosmetipsi Sanctarum Virginum catalogo adscripsimus (1). Præterea novemdecim e vestris sodalibus, ejusdem Apostolicæ Sedis decreto, in Beatorum numerum rite cooptatos invenimus: ex his vero decem, vel Nobis, dum Promotoris Fidei munus sustineremus, studia nostra conferentibus, vel Nobis ipsis e Pontificio Throno decernentibus, is honor delatus fuit. Hunc ipsum Apostolicum Thronum quatuor ex Ordine vestro Pontifices ante Nos tenuerunt; videlicet Innocentius V. quem Sanctus Antoninus insigni laudis præconio commendavit (2), Benedictus XI. ex Beatorum, quos innuimus, & Pius V. ex Sanctorum, de quibus diximus, numero, ac demum Benedictus XIII. cujus virtutum, & recte factorum testes Nos ipsi fuimus. Quod si forte reliqua Familiæ vestræ ornamenta, & in Ecclesiam Catholicam promerita ex animo nostro excidere unquam potuissent, hoc tamen profiteremur, nullo unquam tempore evenire potuisse, ut e memoria nostra dilaberetur Theologorum Princeps, Scholarum Angelus, Ecclesiæ Doctor, præclarum Ordinis vestri Sidus, Sanctus Thomas Aquinas, cujus doctrinæ complures Romani Pontifices Prædecessores

(1) xxix. Junii MDCCXLVI,

(2) 3. part. *Chronica* tit. 20. cap. 3.

res nostri perhonorifica dederunt testimonia (1); quemadmodum etiam Nos ipsi in Libris, quos de variis argumentis conscripsimus, postquam Angelici Doctoris sententiam diligenter scrutando percepimus, atque suspeximus, admirabundi semper atque lubentes eidem adhæsimus, atque subscripsimus; candide profitescentes, siquid boni in iisdem Libris reperitur, id minime Nobis, sed tanto Præceptori totum esse adscribendum.

Haftenus, Dilecti Filii, de hodierni operis, cui præfuturi sumus, gravitate, ac de Paterna prorsus benevolentia, & singulari existimatione, qua Ordinem Vestrum justissimas ob causas superius expressas, aliasque his facile adjiciendas, prosequimur. Reliquum est, ut de ipsa re, quam hic peracturi convenistis, idest de electione Magistri Generalis ejusdem Ordinis vestri, aliqua attingamus. Verum quid unquam afferre poterimus, quod jam probe non teneatis, quodque unusquisque vestrum ab inclito, quem proxime laudavimus, Præceptore Thoma Aquinate non didicerit? Si dicemus, hujusmodi Magisterium ei deferendum esse, qui omnium optimus inter vos habeatur; Si dicemus non eum esse omnium

B2

opti-

(1) Tom. 8. Bullarii Ordinis FF. Prædicator. in Tract. de consensu Bullarum tit. 6. quest. 2. per tot.

optimum, qui sola vitæ sanctimonia ceteris antecellat, sed qui præter morum probitatem, quæ quidem necessaria est, aliis quoque virtutibus, atque animi dotibus, ad recte regendam Familiam idoneis, instructus comperitur, nihil porro dicemus, quod in Operibus Angelici Doctoris egregie constabilitum, & a vobis jampridem lectum, atque animadversum non fuerit (1). Si dicemus, suffragia vestra, sepositis peculiaribus affectionibus, & propriæ utilitatis respectu, nil aliud intueri debere, quam eorum virtutes, & merita, quorum electio vobis animo obversatur, nihil dicemus, quod non egregius Præceptor vester tradiderit (2). Itaque nil aliud Nobis dicendum superest, nisi, ut id agatis, quod vos Præceptor ille vester agendum docuit, utque tales vos exhibeatis, quales, dum alias electiones ab aliis celebrari audistis, eos se præstare oportere dicebatis, qui in eis suffragium laturos erant. Quibus maxime rebus Ordo vester indigeat, vobis potissimum debet compertum esse. Quis huic sustinendo muneri idoneus, qui supra ceteros ad id aptus, & bene regendi capax videatur, cognoscere vos arbitramur. Ne autem in errorem vos labi forte contingat, supplices iterum,

(1) S. Thomas quodlibet. 8. art. 6. & quodlibet. 4. art. 23. ad duodecimum, & quodlibet. 6. art. 9. & quodlibet. 4. art. 15. & 2. 2. quæst. 63. art. 2. in corpore.

(2) Locis citatis.

(XI)

rum, ut antea vos sæpe fecisse putamus, ad Deum Patrem luminum preces effundite; ac patrocinium, & opem Sancti Dominici Patriarchæ vestri, aliorumque Sodalium vestrorum cum Christo regnantium, quique inter Beatos, vel Sanctos ab Ecclesia coluntur, vobis deposcite: dum Nos interea, qui vestris hisce Comitibus non alio fine interfumus, quam ut vestram in ferendis suffragiis libertatem salvam, & incolumem præstemus, novi Magistri Generalis electionem, a vobis jamjam perficiendam, Apostolica Benedictione nostra prosequimur, & in antecessum amantissime complectimur.



18.



Shiell

4

Jan 12.

